
AUGIER.

PER vos belha dous' amia
Trag nueg e jorn greu martire,
Que d'als no pens ni cossire,
Ans vai doblan tota via
L'amors e la benvolensa,
Per qu'ieu ai gran temensa
Qu'el deziriers m'aucia :
On mais vos bays, doussa res, e vos toc,
Ieu m'en vauc plus prion en aisselh foc.

En plus franca senhoria
No pogra mon cor assire,
Qu'ieu non cre qu'el mon se mire
Don' ab tan de cortezia,
Ni que de beutat vos vensa :
E non ai ges crezensa,
Per nulha ren que sia,
Puesca guerir, s'ieu no complisc lo joc,
E visques tan cum Helias et Enoc.

Ai! quantas vetz plor lo dia,
E quantas vetz mi fai rire
L'amors que m vens e 'l dezire,
E m destreing lo cor e m lia;
E 'l vostr' onrada valensa

Fetz en mon cor semensa,
 Plus que far non solia.
 Ara sai ieu qu'eu ai begut del broc
 Don bec Tristan qu'anc pueis garir non poc.

Vostr' hom suy ses tricharia,
 E si us platz, podetz m'aucire;
 Qu'om non poiria devire
 Qui 'l cor del cors no m trazia;
 Quar en vos nays e comensa
 Beutatz e conoyssensa,
 Miels qu'om dir non poiria:
 Si m destrenhetz mon fin cor en un loc,
 Ben a tres ans qu'anc d'un voler no y s moc.

E ja al jorn de ma via
 No serai d'autra jauzire;
 Tan vos sui hom e servire
 Francx e lials ses bauzia,
 Que ses la vostr' atendensa
 No volgr' aver Proensa
 Ab tota Lombardia:
 Quan m'auretz dat so don m'avetz dig d'oc,
 Serai plus ricx qu'el senher de Marroc.

A l'Empereaire agensa,
 E ten a cortezia,
 Quant hom li quer autreyar e ditz d'oc,
 Mas ja als faitz no s pren ren qui no 'l loc.
